

Takornarissat tikillugit sullissinermik inuussutissarsiteqalerusuttunut inuussutissarsiteqareersunullu ilinniarfimmik pilersitsinissamut, soorlu outfitteritut, qimussiussisartutut il.il. naalakkersuisut suliaqaqqullugit peqquneqarnissaannut Inatsisartut aalajangiiffigisassaattut siunnersuut.

(Inatsiartuni ilaasortaq Aleqa Hammond, Siumut)

Akissuteqaat

(Inuussutissarsiornermut Aatsitassanullu Naalakkersuisoq, Ove Karl Berthelsen)

Siullermeerlugu suliarineqarnera

Pikkorissarnissamut periarfissanut tunngatillugu, tamanna sulisussanik soqutiginnittitsilerlunilu, sulisunik piginniinnarnissamut sulisullu ineriartortinnissaannut pingaaruteqarmat, Naalakkersuisut siunnersuuteqartoq isumaqatigaat. Takornariartitsinikkut inuussutissarsiut nunap inuussutissarsiutaasa aningaasanik isertitsinerpaasartut ilagaat, taamaattumik Naalakkersuisut inuussutissarsiutip tamarmiusup pitsaasunik periarfissaqartitaajuarnissaata qularnaarneqarnissaa annertuumik malinnaaffigaat. Tamanna inunnut ataasiakkaanut, ingerlatsivimmut, takornarianut inuussutissarsiummut inuiaqatigiinnullu tamanut iluaqutaasussaavoq.

Nuna tamakkerlugu takornariaqarnermut iliuutsimi 2008-2010-mut pilersaarummi pikkorissuuniissaq suliffeqarfimmilu pissutsit ataatsimoortillugit salliutinneqarput. Takornariaqarikkut inuussutissarsiut sullissinikkut inuussutissarsiutitut allatulli sullivinni ataasiakkaani inunnik isumalluuteqarnermik pisariaqartitsivoq. Piukkunnartunik pilersitsisinnaaneq, sulisooreersunik piginniinnaaneq inunnillu tamakkuninnga ineriartortitsinissaq pisariaqartitsinermut tassunga ilaapput.

Takornariaqarnermut pilersaarutip ilaatut, aammalumi takornariaqarnermik inuussutissarsiutip ilinniartitaanissamik pisariaqartitsinera ikiorserumallugu ”Ilinniagaqanngitsut pikkorissarnissaannut pilersaarut (PKU)- ataani 2009-mi aningaasaliisoqarnikuuvoq, taannalu takornariaqarnerup iluani pikkorissutsip nukittorsarnissaanik siunertaqarpoq. Taamatutaaq annikinnerusumik aningaasaliisoqarnikuuvoq TIKERAAT-pulje-mik taasamik takornariaqarnermut tunngatillugu pikkorissartitsinissanut tapiissuteqarikkut neqeroorutininik amerlisaanissamut ilapittuutaasussamik. Kiisalu takornariaqarnermut tunngasunut ataqatigiissumik ineriartortitsinissamut suliaq aallartinneqarsimavoq. Pikkorissartitsinerit siunertaraat ilaatigut takornariaqarnermi sullissineq tuniniaanerlu aammalu siunertalimmik oqaatsinut tunngatillugu takornariaqarnermi sullissinissaq. Ineriartortitsinissamik pilersaarut

2009-mi septemberimi aallartinneqarpoq ilimagineqarporlu pikkorissartitsinissamut neqeroorutit siulliit 2010-mi upernaakkut piumaartut. Pikkorissartitsinerit naggaserneqartassapput pikkorissarsimanermut uppersaammik allagartartaarnikkut. Pikkorissartitsinerni peqataasussatut siunniutat tassaapput siunnersuummi inuussutissarsiutini taagorneqartuni sulisut.

Pikkorissaanissamut tunngatillugu neqeroorutit soqutigineqarnerallu ingerlaavartumik inuussutissarsiutip pisariaqartitsinera najoqqutaralugu naleqqussarneqartarnissaat pingaaruteqarpoq. Kommunit takornariaqarnermut inuussutissarsiornermullu qitiutitai Kalaallit Nunaanni Takornariaqarnermut Inuussutissarsiornermullu Siunnersuisoqatigiinnut nalunaaruteqartassapput nunap ilaani takornariaqarnerup nunamilu inuussutissarsiutit iluanni pikkorissarnikkut sunik pisariaqartitsisoqarnersoq. Taamaalilluni nunamut tamarmut atuuttumik ataqatigiissaarneqassaaq Namminersortut GTE-llu akornanni ataatsimoortumik pikkorissartitsinerimut iliuseqarnissamut, tamannali pisassaaq nunap ilaani pisariaqartitat periarfusinnaasullu isiginiarlugit. Tamatumalu aamma kingunerissavaa pikkorissarnerit pisariaqartitsiviusumi pisassammata, tassa piffimmi ataasiinnarmi ingerlanneqartariaqartuaannassanatik. Ingerlatassat taamaalillutik brancheskolini pioreersuni, Piareersarfinni, orninneqartartuni ingerlatsiviit il.il. akisussaaffigisaannik ingerlanneqartassapput, taamaaliorniarnikkullu aqqissuussinerit pigineqareersut iluaqutaanerpaamik atorneqarsinnaassallutik. Ilinniarniviit soorlu serviceøkonomingorniarneq aammalu Aalisarnermut Piniarnermullu Ilinniarfiup pilersinneqarneranut atatillugu iliuitsit assigiinngitsut ingerlaannassapput taamaattumillu takornariaqarnermik ingerlativinni pikkorissutsimik kivitsinissamut peqataassallutik.

Massakkut iliuserineqartut aningaasalersornissaannut tunngatillugu tamanna immikkut ilinniartitaanikkut iliuseqarnerup iluaneereerpoq, taamaattumik konto 64.10.17-ip (siusinnerusukkut 62.05.09) iluani tulleriissaarinikkut allanngortitereqqinnissaq nangaasaarutigineqassaaq.

Naalakkersuisut isumaqarput massakkut atuuttoq modulikkeuutaartumik pikkorissartitsisarneq eqaannerusoq aammalu inuussutissarsiutip pisariaqartitaanut naleqqunnerulluortoq. Naalakkersuisut taamaattumik inassutigiumavaat nutaamik takornariaqarnermut ilinniartitaanermik pilersitsinissamut takornariaqarnermut tunngatillugu pikkorissartitsinernit massakkorpiaq ineriartortinneqartuniit misilittakkanik pissarsinissaq erseqqissumik isummernissamut utaqqimaarneqarallassoq.

Qulaani pineqartut aammalu ingerlatat taakkununga tunngasut aallartinneqareersut tunngavigalugit Naalakkersuisut siunnersuut itigartinneqassasoq siunnersuutigaat.